

四庫全書

集部

欽定四庫全書

潛山集卷五

宋 釋文珣 撰

七言古

月夜聽琴歌

石床定起夜方中，為豁幽興開房櫳。
吳天潔淨無雲蹤，萬里一色磨青銅。
明月皎皎行虛空，穿松透竹光玲瓏。
猛虎忽嘯茅屋東，林樹葉葉皆生風。
壯哉宿客清溪翁，對月與我調絲桐。
不拘商羽徵角宮，五音迭奏意無窮。

希聲一一關天聰天神下假山鬼從玄鶴拊舞節奏同
延頸舒翼多儀容嘗聞雅樂與政通乃知此語非顛蒙
更漏欲徹曲未終西隣忽打五鼓鐘溪翁憶着溪頭蓬
抱琴歸去還怱怱願翁重來勿棄儂儂欲共爾論心胸

母子吟

遊子行遠方慈母在高堂砌有忘憂草對之還斷腸母
心乃如斯子心其可忘子心苟如母足以感蒼蒼君不
見漢蔡邕晉王祥

江山縣旅夜

江郎峯頭雲漠漠江郎廟前風雨作路傍古寺不可棲
破屋殘僧情味惡重尋野店度前林夜寒無奈春衣薄
慚媿主人能會意地鑪爇火深相慰何似山中夢覺時
紙被蒙頭聽松吹

夜烏啼

東家屋樹與雲齊夜夜有烏來上棲明月照烏栖烏啼
愁殺窻中戰士妻官家遣夫戍遼西三年不歸守空閨

烏啼不止婦增泣淚痕如雨衣裳濕

有美一人行

有美一人閑且都天然自與常人殊奔逸絕塵遺步趨
宛在大海之東隅珠宮貝闕非凡居鮫綃被體雲霞裾
朝乘一鶴暮雙鳬往來圓嶠仍方壺所交皆古真仙徒
赤松羨門及麻姑共論妙道得道樞天地萬物指馬如
人間歲月良易徂別來眼暗齒髮疎山可泐兮海可枯
相思之念無時無示好亦有明月珠藏之懷袖不敢沽

屢欲致之乏飛魚側身東望空躊躇

過茗溪

茗溪發源自天目一谿東之漾寒淥岸山續續相照映
原田每每資滲漉祇看後浪催前浪當悟新人換舊人
來往舟航謾如識到頭若箇曾知津

茗雪歌

昔聞兩溪水色異茗清雪渾猶渭涇又聞發源自天目
懸高墜峻如建瓴日夜滾滾流不止盡過白蘋紅蓼汀

流入太湖不復辨挹之但聞魚鼈鯉堪笑人生亦如此
百年汲汲勞其形到頭富貴亦何用一卧泉下無由醒
爭似漁翁扁舟獨往最脫灑七十二峯相對長青青

春日吟

春山青春水綠野鳥啼春聲續續提壺勸我飲杜鵑勸
我歸吾歸不待勸吾貧無酒資之二蟲不吾知徒爾為

芙蓉花歌

東鄰檻外芙蓉花初開粲粲如朝霞今朝花謝枝空在

繞樹千回只嘆嗟花謝明年還復開紅顏已去終難回
人生不及花枝耐況有流光白髮催遊子對花心盡醉
老翁見之如夢寐解把浮生比夢中肯計榮華與憔悴

晚秋遊興

餘英山中楓葉赤龜溪溪上蘋花白野翁杖屨往來頻
為愛溪山好秋色白叟虬髯眼深碧邂逅相歡坐苔石
語終長嘯歸青壁恐是雲深避秦客斯人再見雖難期
忘機亦有漁樵席藉草班荆相爾汝無主無賓心自適

沙鷗飛度夕陽間
烟外遙聞一聲笛

趙白雲宗丞以詩送惠柳下謁浙西憲使包宏
齋命余同賦

宏齋伊洛宗白雲風雅主
二公在斯世光艷燭寰宇
白雲歸帝鄉宏齋庇寒士
出處雖小殊憐才酷相似
吟詩貧到骨白雲古知音
吹送宏齋前雄詞重南金
乘流春浩蕩變化那可測
君不見北溟有魚會風雲
一舉自然生羽翼

周草窗命題異人爪搯仙境圖

幽齋衆客多清娛
弁翁開卷示此圖
細畫纖纖比毛髮
老眼眴轉眊若無
須臾神定乃能辨
蓬山圓嶠連方壺
山川盤紆體勢遠
樓觀縹緲棼棼鋪
霓旌羽蓋蔽空日
雲耕鶴馭交天衢
瓌麗綺錯千萬狀
一一盡與人間殊
弁翁指陳更詳悉
言是澄江惠氏所
寶之舊物昔有道
人方外來暮夜延
之入其室蕭然獨
卧無燈明時聞爪
甲鏗有聲明發道
人不知處但見桶
底搯畫成吾知道

人非小巧物物之中存幻眇更于爪畫兩俱忘當與道人同一笑

周草窗吟藁號蠟屐為賦古語

嘗聞阮孚心好屐對客蠟之手不釋閒暢非唯時所推千載嘉名猶著白弁山山陽有吟翁嗜詩亦與嗜屐同盡將書傳資詩用字字句句加磨礱萬象一時供掇拾大翫於詞成鉅集還將蠟屐以自名吾知清尚人難及尚喜江湖有此翁此詩此屐當無窮

風雨

晚來江上天不分老蛟吐氣成江雲夜半大風飄屋瓦
頃刻簷間雨如瀉柴門緊閉不敢開漸聞水聲到床下
開門處處聞啼號盡說浪頭三尺高室廬漂蕩無處所
妻孥大半隨波濤江市一時為沮洳急打行包入山去
通衢沆漭不可行歷盡西山豺虎路但願自今風雨調
無復破塊與鳴條

公無渡河

河源來自崑崙西滔天沃日無津涯擢夫漁子不敢窺
公欲徑渡公誠癡癡公溺死如何為竟委骨肉於蛟螭
徒使萬古瑩篴悲

古松歌

山中草木知何數獨愛菴西古松樹千歲老鶴巢其巔
根有茯苓心不蠹秋來是物皆搖落此君勁色還如故
嘗聞無用乃全生却恐身為材所誤最好無過是樗散
一生不入良工眼

神樹詞

村西大樹高入雲樹根作屋祠為神村農四時常祭賽
但願長幼無災屯更乞風雨皆調適官不追呼無盜賊
六畜蕃滋百穀成報神之賜何終極問農當年未生樹
此樹之神何所附它時此樹朽而仆樹神又向何方去
農笑吾言吾笑農濁涇清渭終難同

為李少監賦秋崖歌

四時之氣秋最清千崖風骨方崢嶸石黛碧玉迭照映

喬松老栢森縱橫上有白雲可為佩下有寒泉堪濯纓
樵夫仰視不敢上鸞鶴日夜長和鳴若有人兮似冰雪
以斯崖兮擬高潔飲玄津兮餐玉屑御清風兮朝帝闕

秋浦老漁

秋浦老漁人不識清溪數灣船一隻釣竿垂垂釣絲直
眼光過似谿光碧得魚歸來不自喫開籠分與白鷗食
却來獨坐磯頭石對著斜陽誦周易恐是渭濱姜子牙
安得文王與同車

蠶婦歎

吳儂三月春盡時蠶已三眠蠶正饑家貧無錢買桑餒
奈何饑蠶不生絲婦姑携籃自相語誰知我儂心裏苦
姑年二十無嫁衣官中催稅聲如虎無衣衣姑猶可緩
無絹納官當破產隣家破產已流離頽垣廢井行人悲
鳴鴈行

鳴鴈嚙嚙来自北一一銜蘆度深磧空受嚴霜損羽毛
不為征人寄消息散落相吳無定所或寄平川或洲渚

相喚相呼不亂羣非比寒鴉無次序弋者多懷害爾心
栖宿須尋烟水深

北風行

北風凜凜生邪寒陰雲萬里何漫漫羣木盡槁葉盡丹
日月迅駛猶飛湍人間光景亦易殫離家不如在家安
胡為夫君乃遊般自古共嗟行路難推輪折軸良可嘆
客中憂緒常萬端何當對面同歌歡願得此身生羽翰
與君相逐同鴛鴦有懷未遂寧容寬耿耿不寐遙夜闌

孤鴻求匹聲嘶酸使我感物摧心肝

聽野老所言

衰翁臥病山之阿東村沈老來相過首言年饑苦無備
次說時政多煩苛其間數事盡切已具有本末非差訛
農家累世服畎畝此外寧復知其他世道愈變俗愈薄
天意亦復相折磨舉貸養蠶不收繭盡瘁耕耨田無禾
千瘡百孔正難補前月里正來催科家貧乏錢辦酒食
賣却養命雙種鵠昨朝縣吏又追喚真如鳥雀遭網羅

兒女啼號顧弗及心如亂絲頭緒多西鄰寡婦更可念
譬彼壞木無枝柯饑寒交煎絕生意母子牽挽沈於河
句句皆從痛腸出語罷涕泣俱滂沱民之多艱有如此
於乎彼蒼其奈何

寒風

寒風蕭蕭吹我衣迎晨入山采薇薇魍魎窺人猛虎嘯
草間多露猶未晞歷盡窮崖與陰谷終朝采之不足劑
憂心殷殷日將暮手持空筐返茅屋賊臣惡子厭輕肥

志士幽人常苦饑古來萬代共如此樂天知命復何悲

讀韓非子

非本韓國諸公子胡乃人形心蝮虺身既入秦而媚秦
肆無忌憚浮商李狂言著書三十篇讀者能無汙脣齒
且言仁義不足用唯有嚴刑堪致治斯言豈足稱人言
反悖經常滅天理助秦為虐猶庶幾名教不容良可耻
昔者韓虔嘗篡晉遠遯其源固應爾吾欲火書而人人
周孔之道不如是

旱雨

賊臣弄權罔明主億萬蒼生受辛苦大家巨室盡逃亡
贖積黃金向郿陂弘羊未烹旱如許弘羊將烹天乃雨
吾言此雨是雨穀點點活人勝珠玉聖恩新放限田租
從此農家飽飢粥

夏暑正隆望秋得雨因賦長句

夏日烈烈揚暉光陽氣入土土力強望秋三日雨滂滂
庶物渟然俱阜昌雨暘時若異咎恒杭稻蕪蕪如人長

西風朝夕吹新涼風來已作酒飯香老農再拜謝穹蒼
此去足以供烝嘗只今吏卒多豺狼唯恐肆威加奪攘
一粒不得入我腸父子悲啼茹糟糠願將此意達君王
毋官貪冒官循良

走馬引

走馬官奴金縷衣食人膏血如瓠肥田夫力耕猶餓死
爾曹醉飽忘年饑天視生民同一子胡為不平乃如此
人衆勝天且勿驚天若定時天自平

答仇山村見寄

十年不見山村人，瑤華忽到英溪濱。
見詩猶如見君面，讀詩隻字必三嚙。
當今滿眼非吾曹，與君例亦同此遭。
風雅之音幸未變，託之足以舒鬱陶。
頗謂仇仙若鸞鳳，造次而鳴亦驚衆。
丹穴方堪養羽儀，他年會作明時用。
為脩樗作歌。

我愛巖間古樗櫟，蔽日參雲過千尺。
樵蘇來往作陰涼，不為風霜變顏色。
匠氏入林持斧斤，材無大小皆選掄。

豫章梗楠豈復有獨以無用全其身山僧因得養生理
故以巖樗自為比只把樛枝庇本根肯誇美幹招殘毀
幽人志士當勿疑聽我朗誦巖樗詩縱為梁棟或易撓
巖下清風無盡時

為山僧作松石歌

一片石一株松石如虎距松如龍風雲變化多靈蹤有
僧託此憇寂寞心與境會無塵容記得當年採秀於天
台萬八千丈之深峯石橋西畔曾相逢

溪翁

青山映溪三十里水中白石何齒齒是非不入溪翁耳
生涯祇在清溪裏終日磯頭坐碧藟釣絲入潭魚唯唯
得魚滿籠渾家喜溪光似鏡山如黛不是溪翁不知愛

西城行

閒蹤無滯留有興即行樂崎嶇歷重丘窈窕窮遠壑遂
步西城道脩壙帶高閼門前設桂栢喧喧歌吹聲老人
咨嗟語予故園林曾是前人墓予謂老人置勿論自古

廢興何定據今人歡樂寧長保後人還為傷懷抱

靈泉篇

高僧誦經經出泉泉靈不許蛟龍眠湛湛長開古明鏡
泠泠暗瀉朱絲絃曾說煮茶甘入齒為是心源功德水
淵然千古無是非遮莫放人來洗耳

題履道兄古松圖

屏間何人畫四松高標半在烟雲中人來盡作真松看
槎枒古怪勢不同一株連蜷如老龍曾見於康廬窈窕

之深峯兩株橫斜蒼黛色曾見於鴈蕩高寒之絕壁最
西一株更奇特老來昏耄記不得想得當初落筆時名
山洞府徧尋思細將覽勝探幽興暗寫凌霜傲雪姿古
來畫者雖無數少有人能得真趣畢宏韋偃骨已寒今
日此圖堪獨步主人勸我為作歌才薄無奈此圖何疾
書一百六十字勿笑迫促無委佗

秋月山中放歌

秋氣清秋葉鳴四山風骨方崢嶸有時支頤靜對有時

緩步遊行朝昏之景無盡藏一皆遺我無人爭中林橡
栗又可拾老夫快活不可名乃作歌歌此情雲中木客
時來賡

山房假寐夢有一客抱琴奏曲而去既覺詩以
記之

山房夜坐無衆喧隱几而卧方澹然忽夢有人來我前
從容為我揮五絃琴聲一一皆清圓如聽廣樂於鈞天
曲終倏爾升雲輶亦有笙鶴相後先未知重會在何年

臨風別恨空綿綿覺來竟亦何有焉唯聞漏鼓聲咽咽
因識死生同寤寐榮枯得失皆無意

關山月

月從東海出冷照玉門關征人家萬里夢向月中還金
闈亦有夢却行玉關道道路不相知思深各衰老胡笳
亂吹哀怨多奈此關山明月何終宵迸淚如金波

月下吟

炎宵喜見月對月還傷神視彼清涼月感吾夢幻身月

色鎮長在身將化為塵月照今人盡還照後來人今人
後人自歸土此月光輝彌萬古了知身幻不堅牢富貴
功名何足取

寧退耕巖維石隆湖隱皆嘗有德於余圖報未
能而俱下世感念存亡哭以十韻

吾生素無寵祿願自向空林灰百念但存心地如砥平
不道人間有崖塹皇天幸能念無辜脫我險難歸夷塗
天定勝人乃其證紛紛諧舌胡為乎四方交朋盈什百

反眼如同不相識豈唯袖手不能援多若蒼蠅變白黑
獨有空門三老人或未識面非交親奮身為余直其枉
惻隱如此宜稱仁思欲報之苦無力但有此心匪石席
今日同為異世人俛仰存亡三太息

余行江湖餘五十載備知交態唯熏自聞始終
不變因作歌見意焉

小人必樹黨勢利相因依勢成乃翕合勢去還睽離君
子貴獨立中心存不欺榮華羞附麗衰謝罔棄遺君子

與小人於此常見之君子誠可宗小人足堪嗤君不見
媚春野卉億萬數花攔映發如有期一朝霜風肆凌厲
傍晚不復相扶持澗底喬松過百尺干霄直上無附枝
黛色不為時所變澹然自有歲寒姿

臥雪歌

潛山道人性疎懶地覆天翻渾不管草座麻衣居絕巘
一間茅屋雲常滿頗愛雲縱亦蕭散於焉誓與雲為伴
終日臥雲忘早晚夢回日照雲床暖彼此無心體舒緩

所以相從加繾綣他年我死雲獨存雲應惋惜吾生短

少年走馬行

少年走馬去如飛大笑吾衰行走遲吾同君健應無日
君似吾衰定有時烏兔交馳猶急傳能令海水桑田變
物之大者尚難常何況百年如迅電要知此語非相誣
更當持以問麻姑

書仇遠吟卷後

昔在英谿識仇遠豈意別來陵谷變死生契濶不相知

一十四年如過電蓮花峯下得重逢老色駸駸驚上面
袖出新吟數百篇非持清新更奇健我道風流似謫仙
定知當上金鑾殿愛才未必無明皇薦聞亦有賀知章

次教西岑見貽韻

宴山山裏白頭翁室空亦復無山童往來山月幾圓缺
入山未聾今已聾柴門反關不容叫翁欲養蒙仍養浩
莫嫌翁苦戀山中良恐出山為小草

懷天目西尖隱者

西尖高插白雲裏下視行人細如蟻客至山翁禪不起
天風吹落青松子

送僧歸廬山

上人家在廬山陰木皮作衣雲作心獨攜鐵錫來參尋
禪中悟得唐人吟秋高忽憶歸山住舊結茅茨連古樹
他年我欲尋君去祇恐雲深不知處

送僧

寒蟲感秋氣非為遊子吟遊子寂寞閒自然動歸心歸

到南巖秋欲晚山栗正肥山稼滿山中獨坐看雲時還
憶湖邊舊吟伴

遣興

七十七歲潛山翁見聞已盡如盲聾祇在山邊水邊住
了得人空我亦空鐵心石腸安晚節未輸金口而木舌
此真難與時人說明知獨有高空月

欽定四庫全書

潛山集卷六

宋 釋文珣 撰

五言律

送林弓寮歸閩省覲竹谿中書往赴安谿縣新
任

當展經綸志初為撫字官五絃能自愛百里幾民安此
去還家便知非行路難為于歌一曲先合盡親歡

別我重雲裏揚舲積雨餘預愁千里道難寄一緘書暫

爾還谿館重來任石渠明朝謾凝睇舟已過桐廬

初三夜月

新月似蛾眉娟娟止片時輝光雖有缺輪郭未曾虧三五還應滿尋常那得知人生亦如此窮達信難期

懷隱者

逸步脫譏讒高蹤不混凡獨甘巢絕谷人似說遊巖自製幽人筆妻裁隱士衫世交空見憶無處寄書函

送趙一嚴守永嘉

九重思共理符竹付更生卿月輝麟譜文星次鹿城精
微數易教信厚播詩聲好使中川水長流不盡清

送兵部兄出守高安

君是甲科人文章已立身遠邦迎父母天闕動星辰行
愛三冬日到為千里春如將致吾后先要惜斯民

雲門六寺即唐靈澈師舊隱

吟徧唐人句玄蹤不易攀一溪清到郭諸寺各依山暮
雨松花老秋風藥井間唯應千歲後華表鶴飛還

題暇亭

王子敬云在山陰道中使人應接不暇今以暇名蓋反騷也

人與山同靜亭安紫翠間無時臨鏡水終日見南山
子敬心猶雜淵明意自閒坐來輕世事薄暮鳥飛還

日鑄山中阻雪

來訪幽人宿春風未變和水聲依澗遠雪意向山多
坡竹摧新粉庭杉失舊柯山童曉相報鹿跡夜曾過

客居阻雪

客居還歲暮風雪掩柴扉人向行中老鄉從夢裏歸
繁

聲交澗竹餘冷入山衣
消遣憑詩句猶慚未入微

新昌南巖

大禹未疏鑿此山為海門
試從樵逕上猶有釣車存
佛屋棲靈竇仙墳蔭遠村
巖頭一滴水居者不知源

宿山庵

絕頂一庵孤悠悠清夜徂
野僧寒出定山鬼暗相呼
泉落池應滿雲深樹欲無
何年捐萬事來此共跼踖

野祠

翁媼已相催喧喧鼓笛來荒祠三面水老樹一身苔休
咎馮巫語凶豐信玳杯神前釃酒罷風散紙錢灰

和人晚秋客思

雙轂苦難留江城又晚秋故鄉難寄訊倦客獨登樓衰
草重重恨征鴻字字愁漁翁却蕭散吹笛過前洲

節物

節物苦驚人那堪遠客身梅心輕送臘柳意轉隨春叢
薄啼新鳥深泉動蟄鱗獨憐歸夢短不得面慈親

姚江舟中夢故人勸歸

一舸寒江上蕭蕭兩鬢華不唯傷道路終恐委泥沙宿
雨添山靄秋風起浪花故人應念我夢裏勸還家

鄞中他山堰

碧浸他山古梅梁昔化龍江溪一堰隔禾黍四郊重絕
唱思幽客歡聲徧野農長官功不朽遺廟合歌鐘

漁父

在處變名姓往來長嘯歌一身無賦役幾口共烟波江

月垂綸下汀雲宿棹和却應嫵渭叟老去脫寒蓑

忠文洪相公挽辭

間氣鍾河岳深衷悟冕旒雄文驚萬古勁節凜高秋清
廟絃何絕明堂柱不留我生蒙許與灑淚莫能休

盛德歸冥寞斯文轉寂寥聲名昭信史功業在清朝遺
表祈天切忠魂入地遙九重思亮直應作楚辭招

水亭舒眺

秋風水上亭獨坐望郊垌佛寺山偏好漁家地亦腥桑

枯因抱蝎草腐自生螢踏月歸林下柴扉尚未扃

鄞中桃花渡即事

城北桃花渡樓居半海商官河通遠浦津樹雜高檣
旭日江烟暖東風水草香為看風土異客子又懷鄉

自鄞江東泛舟至黃山橋度嶺遊白雲寺

望望白雲居崔嵬在碧虛水窮方度嶺石峻不容車
舊愛松蘿頂重來筍蕨餘却憐清絕景無地着吟廬

建溪青玉峽雲際寺

飛瀑掛晴霓山門對小溪曉行青玉峽時聽白猿啼野
竹樊蕉徑脩桐間茗畦儻容分席地便此卜幽棲

石橋瀑布

瀑布依真境何曾與世同灑空輕作霧濺石亂生風絕
壁驚飛鳥危梁卧斷虹人言龍窟宅祇在此潭中

九仙山中瀑

一水從天下源深不可知千尋垂縞練餘沫散珠璣響
激雷霆合風生草木歌老僧來灌頂濺濕薜蘿衣

雙溪寺

複嶺又重岡，塵緣此地忘。
五峰朝寺古，雙澗出雲長。
深靜宜棲隱，高寒易雪霜。
擬登華頂去，幽徑旋鋤荒。

煙霞石屋諸寺

緣山一徑微，竹樹隱禪扉。
雲絕去來性，僧無生滅機。
風簷鐵自語，陰洞石能飛。
終擬攜鉞錫，他年向此歸。

溪寺書懷

野寺依溪曲，長橋接柳堤。
俗人忙不入，孤客自安棲。
嬾

散今成性煙雲盡入題
鄰居有農父時與話耕犁

宿閩中溪寺

獨宿閩溪寺中宵夢自驚
月斜移樹影風急轉灘聲
起對清秋色難為遠客情
雲山千萬疊何處是神京

送友人住海寺

海上蓮花國初從太守招
衣傳方石偈舟泊丈亭潮
漁子應焚簷鮫人擬獻綃
他時思舊社無奈寄書遥

山寺

古寺氛埃表幽程屈曲通高峰常似雨陰壑易生風
架棧為平地寒鐘出半空他年依老宿掛錫此山中

出城行半日始得到招提山氣隨時變州形入望低
地靈多產藥村遠不聞雞詰旦還離此尋幽過別谿

閩中歲暮懷吳中

冉冉年光盡悽悽客思驚疎狂輕萬事行役負平生
海月移松影山風壯瀑聲寒宵頻作夢曾不離吳城

懷安養

淨土雖周徧標方必在西一心無彼此九品自高低久
別情無奈重歸路不迷依憑法藏願名字欲先題

惟吾與西佛天性本相關怡悵迷方久浮沉苦海間三
心終不退上輩必容攀慈念應尤切提攜早共還

容易拋鄉國漂流幾歲年癡兒竟何事慈父必興憐客
汨東風裏歸心落日邊如今定當返業已具西船

西方清泰國元自是吾家寶樹千般樂金池四色花同
遊諸伴侶一別幾年華有意重歸去途程本不賒

春日懷人

林嶺春雲滿陂湖春水多舊鄉書不到久客意如何老去長牢落悲來一嘯歌故人今在否相憶夢青蘿

贈隱人

換却青雲志高眠舊隱廬閒門誰踐草隙地自栽蔬交道貧尤密吟情老不疎囊中何所有一卷養生書

七里灘別友

斷壁青松古空江翠靄多行人幾迴老漁父祇高歌縱

有重逢約其如此別何明朝重回首惆悵隔烟波

湖亭別友

與君俱是客重別意如何斜日孤帆去寒江風浪多
遠懷隨鴈影新詠雜漁歌知此遨遊地何時復共過

江上與故人暫會復別

交朋似君少澹泊自真宗不記何年別翻驚此地逢
烟波涵暮景霜露改秋容又說天台去天台千萬峰

池上別友人

今朝攜手處高榭俯風漪正爾俱衰暮寧堪又別離柳
長深映馬荷弱未勝龜宅日遙相憶還應話此時

贈王門老賓客

薄俗謾紛紛馬知屢與真空餘千里馬難覓九方歎古
道何當復時風未易陳王門舊賓客懷舊重悲辛

孤客

衆人皆汲汲孤客自俞俞方外居來久囊中物盡無行
將筇作伴講以石為徒若問何宗旨饑來飯一盂

除狹

世狹難紆轡全生託散財紛華因地遣懷抱向山開野
祭鴉爭聚貧居燕亦來不知江上笛何事有餘哀

題顏晞仲歸隱

飄然攜杖錫歸隱故山中鳥道雲泉遠猿聲烟樹重清
閑銷不盡塵累坐來空早晚須相覓知居若箇峰

行石林蒼莽間頗多幽致有思歸隱

離城纔一舍已得近樵漁秀石雲松路荒籬水竹居陽

坡收早粟燒地長新蔬便好為茲隱吾生不願餘

看月

靜室焚香罷間吟倚石欄忽從青玉峽湧出白銀盤列
宿消芒盡清暉照膽寒終宵不成寐二十四回看

尋北山友不值

山南山北往來往共煙霞午徑行松葉秋籬間菊花叩
門人不見歸路日西斜應是孤雲性難教只在家

早雨

驟雨幡然下風雷駕疾威烏兼巢穴墮龍挾水雲飛物
象回生意神功解旱圍田間喜相語點點勝珠璣

三術

利祿與名稱拘囚豈易勝由來立仗馬有媿脫鞵鷹達
者知求解貪夫反自矜吾方用三術止觀足堪憑

山夜

山氣夜沉沉泉流石澗陰虛廊羣動息寒殿一燈深
潔白孤蟾影清澄野客心興來歌古調風動古松林

閒樂

祇以閒為樂寧論是與非
安身唯草座終歲掩柴扉
水菰收菱芡山糧采蕨薇
幾回清夢去還共白雲飛

題規無範雲深室

物外清虛境由來遠衆紛
靈蹤幾年說梵放或時聞
似有似無路漫山漫谷雲
自難容俗駕曾不待移文

飛來峰猿

恐山還欲去着爾慰山靈
掛處頻分影吟時不見形
鷺

峰愁外遠巴峽夢中青月下三聲苦幽人却要聽

禁體詠雪

應鴈雨

去聲

連朝豐年瑞已饒亂聲還款款猛勢尚濛濛

嶺嶠松增秀原田麥長臆窮閭休怨冷見睨自應消

禁體詠雪時方用兵故其末及之

擁衲坐深更頻聞款款聲祇疑為落葉不道是飛霙曉
壓松頭重寒鋪砌面平幸成豐歲兆何事却徵兵

地遠

地遠無人迹
心閒見物情
洞中飛石燕
崖頂住山精
僊木開花異
靈泉吐溜清
幽棲已成趣
不復問浮名
地遠隔凡塵
因而此隱淪
閒知雲意度
清愛水精神
蔬食聊充腹
麻衣足蔽身
休嫌吾懶拙
懶拙迺吾真

送遠

離情不可說
握手更躊躇
為客三秋盡
還家千里餘
山程楓葉赤
水驛柳條疎
日夕空林下
何人伴索居

吾性

吾性本疎狂難教住帝鄉看心忘世界濯足愛滄浪往
事皆如夢浮生底用忙到頭華袞服不及芟荷裳

愛性

愛性畏謹呶雲深一徑茅了無徒屬累唯結鹿麋交灌
木由來古修篁亦漸苞終然聲利表頗若類由巢

嬾性

嬾性難趨世深棲自養蒙得閒真可樂未死已知空陰
壑長留雪喬林易有風見聞今又絕眼暗耳全聾

野性

野性難諧俗空林自葺茅且教同木石不是慕夷巢竹
樹長陰合風泉夜響交山中無小草那許世人嘲

詠苔雪

苔雪水烟鄉溪風六月涼家家有船步日日聽魚榔柳
樹垂陰密賞花入夢香山人心亦愛時到詠滄浪

訪山家

山翁居處僻野屋蓋茅新自得烟霞趣應無車馬塵恠

禽啼似鬼古木變為人不是忘緣者誰能與子親

送王逸人

閒身如野鶴天地一虛巢山水琴中趣松筠世外交懷
親逢遠信開卦卜歸爻更說雲門好相期共結茅

送立上人偕沈東臯謁吳退菴

闔閭城裏去瘦沈是同舟不用悲遊鹿唯須問狎鷗夕
陽空茂苑殘雪徧長洲太守相逢日言詩定點頭

送王商公遊永嘉兼呈東叟曹侍郎荆山劉學

士

覓句東嘉去春風草又薰
一千餘里路四十九盤雲
幸有江山助休為旅泊分
曹劉諸老在為我致殷勤

旅中秋晚

秋露洗晴空秋光處處同
楓霞明野樹蘆雪覆沙叢
旅況悲寒蜚歸心寄斷鴻
幾時隨牧豎吹笛亂山中

桐廬縣

瀟灑桐廬縣名聞漢代餘
民風尚耕釣土物富薪蔬
江

水連衢港雲山帶越墟終期置茅屋鄰近釣臺居

華亭縣

地占三吳勝名因二陸雄海村宵見日江市畫多風商
賈通倭舶樓臺半佛宮歸來千歲鶴應恨故巢空

臨安縣

霸業歸王室空城但黍苗溪隨山勢轉路入市聲遙故
俗多征歛遺民尚寂寥傷心到今古祠樹亦蕭蕭

秋聲

商飈何厲疾，羣籟盡囂囂。迴穴生崖谷，溟滂度沕寥。恍
疑沙漠戰，誤聽浙江潮。遮莫頻相聒，羈魂易得消。

江上留滯有作

寂寥誰與共，華髮卧滄州。月照空堂夕，蛩吟壞壁秋。故
人稀，問訊遠客易生愁。安得如沙鳥，煙波任去留。

秋江獨泛

秋波無際遠，短艇遡寒江。風景由來異，鄉心未易降。晚
烟生驛樹，空翠撲船窗。賦得滄浪曲，長謠不便腔。

水鄉聞鴈

短景又還暮，羈愁那易禁。
半生無著莫，萬事任浮沉。
衲敝蘆花冷，爐存葑火深。
雲間斷行鴈，時復動哀吟。

孤雁

孤雁如貞婦，餘生不再雙。
避寒辭北塞，隨日到南邦。
倦翼堪憐影，哀音自滿腔。
空閨人聽得，離思轉難降。

秋感

客中難度日，池上獨徘徊。
露冷芙蓉死，天高鴻雁來。
枯

莖寧再潤羣蚪易成哀對此能無感吾親在夜臺

歸夢

幾歲遠辭家勞生詎有涯客居終不穩詩鬢獨先華掃
葉江風厲侵床山月斜念歸歸未得清夢入煙霞

余九月三日忽病瘥日必一作肢體憊甚至十
日隱几坐卧忽夢二人幅巾杖藜相過談詩及
寤但記得一聯云骨換言方異心空意始圓是
夕瘥止次夜又自夢坐亡手書遺偈四句前二

句雖已書而不能記憶後二句云放身行碧落
古樂聽鈞天書至落字而覺末句雖書未全而
口尚能誦於是起就佛燈書之病遂脫然信詩
之能愈瘡矣今足以起結成唐律一篇語不工
以記異也

吟是大乘禪禪深夢亦僊放身行碧落古樂聽鈞天骨
換言方異心空意始圓手按黃菊蕊寫放瀑崖邊

春夜夢中得觀與心為度身將世作仇一聯既

覺而足成四韻寄修觀者

高人持遠流，淨行在林丘。
觀與心為度，身將世作仇。
不曾過午食，常滿六時修。
苦海人求度，師應駕法舟。

清苔

清曉泛苔濱，長歌撥櫂頻。
山川開霽景，草木暢餘春。
野老知閒趣，沙鷗似故人。
絕勝拈麈尾，駕說弊精神。

題竹房

野水連苔徑，山雲掩竹房。
人閑清晝永，鳥語綠陰涼。
斷

刻排籤古新茶入焙香眼前清事足不道在殊方

宿靈鷲瀾師房

清泉繞砌流境界極深幽有客暫投宿羨君長此留詩
成雲滿磬人靜月當樓忽聽清猿嘯南山山樹秋

幽程

幽程寧憚遠野外意無窮山疊高低古川流宛轉通采
芝隨羽客拾橡共狙公爛熳遊三日塵勞頓覺空

隨寓

我忘方就隱鳥倦自知還隨寓皆為道何人有此閒微
茫春水渡平遠夕陽山盡入清吟景誰言勝事慳

寄淮頭家兄

君向淮壩去相思夢不安
兵戈猶未定道路自應難
曠野人煙少荒城鬼燐寒
故園松菊在何必戀微官

秋夜憶兄

石房清睡熟猶擁黑貂裘
鄉遠難為夢山深易得秋
脊令空在詠蟋蟀暗生愁
何日潛溪岸吟詩共倚樓

哭何甥

秀穎出儒林，吾甥所得深。
良材竟難用，造物果何心。
身後無遺育，生前惜寸陰。
臨棺一悲咤，萬籟亦同音。

邊思

少年為遠戍，兩鬢已髭髭。
百戰功誰賞，空閨信不來。
鄉關成夢境，邊月是愁媒。
聽徹胡笳曲，寒聲轉更哀。


春江夜泛

江月照揚舲，乘風過萬汀。
素光流遠漢，高浪濕寒星。
客

恨消長笛閒身渺一蘋到京天未曙隱隱越山青

反舌

毛羽誠無取禽中號善鳴能將一片舌巧作百般聲元
是因風氣曾非出性情君看五月後瘖默媿流鶯



欽定四庫全書

集部

潛山集卷七至九

詳校官庶吉士_臣李傳熊

主事_臣呂雲棟覆勘

謄錄貢生_臣張大同

謄錄舉人_臣范翔集

欽定四庫全書

潛山集卷七

宋 釋文珩 撰

五言律

馮深居宰會稽

詔辟稽山縣清風在一琴那知致君術不是字民心官
舍桐陰合園扉草色深退衙人吏散應共野僧吟

送趙寒泉重宰南中邑

字民無異術薄斂與寬刑宓子琴猶在爲予歌重聽瘴

雲消晝黑毒草變春青萬里南中路秋風幾驛亭

錢塘晚渡

殘日下重城寒潮起暮聲岸遙江樹小天闊野雲平
一分吳越孤舟寄死生如何未歸者猶此計鄉程

泛富春江

夢寐羊裘客清遊樂此邦一篙殘臘雨千古富春江
岸轉青螺合烟明白鳥雙洗除名利跡灘瀨日春撞

釣臺

世祖龍飛日玄纁起故人榮名既無取閒足固應伸釣
石關乾象江流入富春高風千古在來者自迷津

懷寄南陵尉沈道正

南陵初作尉應亦似南昌名在神仙籍才優翰墨場盜
聞無欲止吏化不欺良交舊如君少懷思未易忘

寄潛齋王尚書

自解朝纓去西山有的傳此心如白水把酒問青天直
道難諧俗閒身勝得仙山林鐘鼎味併在小梅邊

客中會友

客塗方浩蕩，歲物正蕭條。
相見江城暮，俱傷鬢髮凋。
陰雲將變雪，寒水不成潮。
明日還為別，離愁未易消。

重遊天台華頂峯

梯空上華頂，老脚尚能堪。
照膽泉源異，薰人藥氣酣。
危巔窺巨浸，晴日破重嵐。
記得前回到，幽人未結庵。
天台三萬丈，華頂入穹蒼。
片石群魔懾，千年古寺荒。
樹枯頽，菌出僧老白，眉長極目滄溟際，烟波更渺茫。

野興

野人乘野興短策勝華軒緩步有幽趣長歌非俗言烟霞僊佛境鼓笛鬼神村遯世今成樂浮華豈足論

天台野興

短策堪扶老飄飄野興濃山行不知遠真侶或相逢積溜穿幽石長蘿上古松今宵隨處宿難定在何峯

示山友

地僻斷知聞相過知有君晴溪堪數石晚岫暗通雲果

熟援無數松高鶴不羣深居豈無事終勝世紛紛

鴈蕩大龍湫

深蹊入薜蘿一瀑瀉巖阿曾閱西天志言居諾詎羅斜
飛疑是雨清激自成渦下有蒼龍窟樵人不敢過

采菖蒲

鴈蕩高寒處穿雲採得來豈能同野草容易有花開瘦
節偏宜石纖叢不受埃幽人知爾性曉澗汲泉杯

客袂

客袂只翩翩家林何處邊
天寒愁遠道木落感衰年
慘澹漁村日淒涼鴈渚烟
秋來更多疾空有夢歸田

贈山中琴友

雲影晝沉沉雲邊草徑深
樹為幽鳥宅山是隱人心
靜室無他物清風寄一琴
調高唯自識不問有知音

山中僧

日落西山淨雲歸北崦昏
老僧方在定童子不應門
伏虎知慈力靈禽演法言
檻前泉數斛清澈是心源

旅夜

秋宵似歲長旅館更荒涼燈暗鼠出穴天寒蟲近床
羈縻彌歲月老大易悲傷幸有茅廬在何為別故鄉
離人厭夜長獨起坐空床苦雨遲家信秋雲隔舊鄉
燭殘重作燄桂濕不生香倘得歸期遂閑居在上方

宿海上正覺寺

霜滿啼猿石風迴落鴈洲半生為遠客此夕欠同流
白月無窮意滄波不盡秋倚闌吟未足長嘯上峯頭

過逸人居

尚此高閑久空林
舊徑存掩關防俗駕
登閣俯鄰園植竹
驚初筍移花過別根
幽懷在自得勿易與人言

為林隱君賦石田

石田所無用君獨愛斯名
應為詩書種免教人世爭秋
風還自獲春雨不須耕
除是長沮輩能知高隱情

胡逸人幽居

幽居清絕甚四面盡滄波
柳步春船集花源晚吹和
宦

情垂釣薄吟思捲簾多便有書來辟其如愛此何

澤國幽居夏日雜題

澤國無裨暑幽居趣自長
花開殊旦暮稻熟間青黃
急雨分塍下微風度水涼
斷除車馬跡日日聽魚糧
為得近樵漁來尋此地居
省交長閉戶耽靜欲焚書
自愛心清淡人嫌禮貌疎
徑荒從草沒衰懶不能除

遠遊

林憩無完室舟行避惡灘
異鄉為客久浮俗定交難
草

引春愁長霜侵曉夢殘忽聞城角動歸思若為安

客中春日

客處空林下貧唯七尺單重陰迷曉色細雨作春寒鄉
信憑誰寄離情強自寬一詩吟未穩倚遍石池欄

春日

春泉青似澱春嶂碧于螺遠近隨吾意芒屨幽興多人
生行樂爾富貴復如何難與時人道風前獨放歌

麥秋遊興

心喜麥秋晴貪遊舉步輕沈寥無點翳山水有餘清怕
入紅欄隊來尋白社盟應門童子熟認得老夫聲

宋氏林園

徑穿荒草入門向斷河開不是君居此應無人到來種
花逢雨活接樹待春回冷咲求名者衣間有俗埃

集奉川道中

一路盤雲遠連朝策瘦筇神祠依古木佛屋占奇峰立
石分田界疏泉作澗春因思似鄉土歸意忽然濃

雨夜

身同水上萍老去尚飄零
遠客人誰到空床夢獨醒
閃雲雙電紫晦雨一燈青
慷慨長歌發歌聲入杳冥

登太白絕頂龍池望遠

蒼莽勢連空躋攀徑絕蹤
亂峰排似戟片石響於鐘
鳥語春雲密龍歸暮雨重
下觀羣岫小始覺此為宗

湖寺上方通玄峰頂

峰頂非人世青山滿目多
塔層侵樹影鐘響度湖波
心

外元無境詩成亦是魔
禪翁清淨耳渾不聽笙歌

客遊

客遊忘歲月長是自調心
野水偏多浪浮雲易作陰
途窮何用哭興到即須吟
吟到忘言境方諧正始音

旅况

日暮投村館悽然逆旅情
地荒頗有盜城遠不聞更
度歲無多日思鄉是幾程
聽雞還束被霜月伴晨征

柘溪道中

荒烟迷小市細雨隔遙津
麥浪農疇晚桐花客路春
幾番時序換兩鬢雪霜新
唯有溪邊鷺相看似故人

山中古墓

白石蒼苔路荒涼古墓門
看來百歲後曾有幾人存
故物餘翁仲今誰是子孫
狐狸穿敗穴殘魄不能言

懷歸西國

此世為何世吾身亦幻身
固應常邈邈其可效頻頻
錢日懷鄉國間驚憶故人
得歸方始樂久客厭風塵

老大

老大偏多感，那堪客路中。
淒涼經月病，安忍半生窮。
衰草凝霜白，高楓借日紅。
今朝方暫起，先問菊花叢。

散人

乾坤有散人，事事不關身。
斂念息諸妄，到頭唯一真。
忘榮寧慮辱，無富豈嫌貧。
雖道青山好，猶知是外塵。

探幽

秋色令人愛，青藜助遠探。
柿楓丹互映，天水碧相涵。
絕

景沙鷗占幽程野老諳謂予雲外去更有古龍潭

立春日

上國又逢春衣裳化客塵園廬空入夢歲月但依人生
意歸羣物窮愁老一身喜餘鷗鷺伴猶不恠吾真

臘月立明年春

閏歲兩番春流光故逼人月筩將謝丑斗柄修旋寅王
作梅容潤金歸柳眼新物情雖萬變曾莫變吾真

吳中靈巖寺

離宮今作寺往事日荒蕪
越女承恩寵吳王失霸圖
廊斜帶頰香徑直通湖
莫上琴臺望風烟滿舊都

廢宅

昔年誇富貴磨滅等流塵
應是重歸燕難尋舊主人
徑莎空泣露門柳不成春
唯有同遊客經過感嘅頻

天目山逸人居

隱處元無路烟霞素所期
不逢樵子說那有世人知
樹老回春晚山高見日遲
欲為重到約恐爾又深移

西風

西風落葉間孤客有餘閒
寒水皆歸壑秋雲不離山
鶻翻枯草去鴉帶夕陽還
幽趣何人共柴門祇自關

歸興

歸興比春濃迢迢發鏡中
船頭指西日帆腹飽春風
岸柳眉舒黛源桃臉露紅
到家天已暝童穉候衰翁

隆壁嶺

石徑隨山轉迢迢十里餘
險曾稱地壁高合號天衢
老

樹因風折新畬趣雨鋤層巔人不到異鳥自相呼

歸棲竺嶺將啟午供野鶴必鳴寺僧常以此為

候

古寺千峰表雲泉處處佳山靈嫌俗駕野鶴喚僧齋靜
默通玄理幽深愜隱懷閒門何用掃秋葉任平階

陟三十六渡溪唐隄嶺

三十六渡溪溪邊絕去蹊亂山如疊浪一嶺類登梯風
緊妖蛇出烟昏異鳥啼蜀僧言劒閣與此亦相齊

山巔水涯

布鞵與青鞵山巔復水涯
閒為真富貴吟是好情懷
既可全吾樂何慙與世乖
自隨無畚插忘死亦忘骸

殘夜清坐

壺更猶未徹起坐看螢流
夜氣清如水禪心淡似秋月
沉西嶺樹鐘動上方樓
可有昏冥者知吾所得優

龍井

崖井涵虛碧心塵望即空
遙通滄海脉近出白雲峰
旱

夕翻為雨饑年屢變豐小魚繞似葉誰識是真龍

五洩龍井

五井蜿蜒宅幽深父老言傍溪唯見瀑度嶺始知源夾
谷斜暉隱空林夕電翻屢聞當旱歲嘆雨出松門

雷峯

不定似飛蓬還來宿此峯霜欺孤客枕風亂四山鐘好
夢如冰薄歸心與酒濃舊房誰占住門有最長松

歲旱

經歲雨不作溪源皆絕流
旱妖長似夏蟲響謾占秋
滿目傷黎庶焦心在冕旒
天河盍傾瀉併洗甲兵憂

行飛來冷泉水石間

驚嶺清無盡池亭趣亦佳
泉衝沙菊出石壓樹身斜
居者應遺世遊人欲忘家
蓮華峰更好惜被白雲遮

秋野即事

深原草徑斜烟際兩三家
老屋門無鑰清溪底見沙
斷蟬嘶敗柳孤蝶戀寒花
歷省曾遊處分明似若耶

安分

鷄鵬雖有異小大各逍遙靜處安吾分塵緣坐見消烟霞開古色松栢尚高標更愛無生侶時來伴寂寥

甲子歲初夏連雨作寒

雨脚何當斷風頭不肯收中宵還集霰四月尚重裘客有塗泥嘆民懷畎畝憂是誰同燮理對此合包羞

苦雨

秋雨連三月愁吟野水濱漸看禾黍沒難使渭涇分山

澤纔通氣天霄便作雲民憂底墊苦苦語不堪聞

秋色

西郊金氣盛庶物減華滋穰穰丹楓雨茫茫白草衰炎
曦何慘淡氣曠若委遲對此淒涼景能無宋玉悲

送楊菊屋

菊屋何為者耽吟嘔肺肝短衣空自詠長鋏向誰彈不
計為儒誤唯言得句難幾人憐此別把酒不成歡

送友

山臨東郭暮路轉北原斜此地輕為別孤蓬不戀家客
程何地盡離思滿天涯明日重陽至同誰對菊花

送人

送子西風裏令予起別愁何時通遠信逾月在孤舟野
果經霜實潮田帶露收明朝於此地獨自倚高樓

送北征人

與君俱是客那復送君行未卜重逢日難為欲別情露
花皆遠淚風葉是愁聲到日寒應極脩途七十程

休糧僧

禪貌如冰雪禪心去町畦
休糧烟火絕養氣語言低
空室無關鑰隨身止杖藜
不曾遊聚落終老只山棲

送極太初住鄞江寶巖

閩相招惟重邦人望亦濃
欲開新象教應掃舊孤蹤
烟水浮鉶錫雲山應敲鐘
寶巖初變土遙想雨花重

送雅上人自鄞歸杭

之子幡然別何人伴寂寥
相從非世道獨去是寒朝
目

送孤帆遠魂隨曉浪消重來須定約莫待隔江招

野僧

野僧塵慮盡住在最深峰庭樹巢孤鶴崖湫宅老龍瀑
綃懸百尺雲幌幕千重靜裏玄機發登樓夜擊鐘

送杞上人歸於潛山

同鄉唯子在欲別意何如歸路青苔遠還家白露初山
光圍古邑溪影渡寒魚須為過星渚高風似二疏

送僧

空山草木秋相送古原頭倦客難為別寒蛩替說愁
舊房深翠壁歸路隔滄洲後夜多明月相思為上樓

候禽

候禽來報我春已到園林凍解通泉脉風和動草心
由來增齒臘翻是促光陰其可陪人事衰遲已不任

竹居

簷外竹珊珊空房住一間無人曾到此老子有餘閑
土蝕銅罇綠苔滋粉壁斑於焉自成樂遮莫笑癡頑

懷別越中友人

白首蒼山裏生涯舊已空
別離人易遠江海意無窮
夜月悲新蛩秋烟落斷鴻
遙思來往處朝暮有樵風

山中秋日懷友

庭樹涼飈入西山爽氣多
獨行清澗曲閒詠紫芝歌
野饌甘黃獨山衣足薜蘿
幽人同此好何事不相過

夜坐

孤蟾如鑑明照我坐寒更
列宿光芒淡滿林風露清

行守犬吠猿過宿禽驚靜趣憑誰會忘言對短檠

古寺

古寺居深處隨緣掃一房本圖依水石因得避炎涼
皓鶴巢松潔青蟲蠹橘香但教終遠俗貧賤亦何妨

欽定四庫全書

潛山集卷八

宋 釋文珩 撰

五言律

雪霽

靜寄向空林於今歲月深
因知閒趣味嬾與俗浮沉
霽雪千峰玉朝陽萬樹金
是吾真富貴不覺動微吟

為言以道賦巖隱

隱者心常靜山林迹易安
幾年靈運屐九轉葛玄丹
石

圃菁苗在崖房桂影寒
豈知塵世窄萬事雜悲歡

湖亭

湖波方瀾瀾柳影自珊珊
有客坐終日城中無此閒
鳥飛明鏡裏人語翠帷間
月下清尤甚今宵擬不還

行止吟

行止定如何江湖歲月多
情真疑近傲語直似傷和野
饌甘藜藿山衣愛薜蘿
因同田父熟學得飯牛歌

中殿功德永壽寺產紫芝

厚德孰能名靈芝自化成人間無此種天上合分莖紫
蓋隨王母彤雲表帝京僊家多服餌鸞鶴共長生

聞似道入相因賦詩

盛德方為貴虛名底用高異時游蕩子今日擬蕭曹紅
粉催身朽清霜入鬢牢勢窮人事改槐棘等蓬蒿

靜中

靜中觀世道一一總非真齟齬英賢詘依馮鄙賤伸狂
瀾乘颶勢枯木借藤春何似都忘著沈潛自養神

山中道士居

寂寂老僊家
蒼山一逕斜
還丹延日月
洞府足煙霞
野鶴千年壽
靈桃幾度花
豈知人世
上塵事亂如麻

贈孤山道士

多年於此住
賣藥但資身
窻冷梅花月
門閒柳樹春
水妖愁使術
山鶴伴朝真
果欲求仙道
惟應自養神

過山家

世外無塵累
幽居趣味長
深蹊竹影薄
小圃藥苗香
水

氣浮溪壁山風掃石牀頻來從此始莫怪老夫狂

野步

野步任吾情深村復遠
垌陂塘波瀾瀾坡壟麥青青
婦知蠶性田夫識地形
牧兒尤可喜記得相牛經

春日野步

春色在笻履山前山後行
野花隨處發林鳥百般聲
幽徑遙通寺清流可濯纓
村翁忽相值又得盡閒情

野步即事

疊嶽復平原行行足力煩野程難較里旅食慙依村棗
熟兒童聚禾收鳥鵲喧徘徊顧風景不覺念丘園

開襟

開襟坐石床豈是俗肝腸月露寒秋氣天風生夜涼禽
猿四山寂松桂滿林香萬事不相接誰知幽興長

山中雪

中宵霰雪零寒氣曉來凝崖樹當中折山池到底冰
磨強食肉松火勝添繒籬戶牢關上何人喚得鷹

送僧之華亭

忽爾來相別攜琴便出關此行離日下何事到雲間郭
外遙通海舟前少見山應思舊樓處樵屋過秋閒

送襄錦二上人之鄞

春風湖上別攜手欲何之細問重來日那曾有定期舟
行江路永錫掛海峯遲若有東南使相逢即寄詩

寄西山高雪庭

支遁還山去翛然世外心不曾離磻壑長是愛雲林馬

放秋場靜龍眠夜井深山林如許到早晚亦相尋

贈隱僧

高僧成獨往古路少人過
切栢貞心在看山靜意多清
鐘生響答空翠與雲和不解
相隨住其如白髮何

酬源上人見寄

自從相別後聞過海邦居
不得陪鄉話空煩寄遠書
林聲隨雨散溪影度雲虛
若遂東遊計終朝到子廬

送僧之湖南

交遊星散盡之子復南行惜別悲楊柳相思寄杜蘅好
山須駐錫惡路莫貪程近得湘中信湘中寇未平

哭復荊山

分講南山日人推學問精彌綸八教網堅實五言城願
力生前重聲華滅後清家山孤塔在過者敬如生

送敬從可上人

愛君心似我十載共隨緣離別從茲始音書何處傳嶺
雲迷晚寺江水入春田遙憶歸棲後松門獨夜禪

鄧中送坦上人歸故里

白雲相見初而子獨知予世態易翻覆道交難間疏三
江同遠棹此日晚離袂莫放音書絕東來有鯉魚

送僧歸日本

遠人仍遠別把手話江臯積水三韓路西風八月濤海
門山似粒洋嶼樹如毛他日難通信相思夢寐勞

天目禪師歸梁渚舊隱

聞師歸渚上欲盡百年間獨鶴知難侶孤雲不易攀龍

孟經幾綴虎錫上重環禪子多求法玄門為啟關

孤山懷圓法師

湖水繞孤峰知曾住此中既傷遺塔廢重惜講臺空
鷺護晴池乳鷹呼古樹風唯聞林處士清節與師同

持律僧

堅持先佛戒不染世間緣過午都忘食終年只坐禪
可曾焚蠹木長是濾蟲泉何日能相見同君話五篇

贈隱僧

禪居既高靜道氣尤淒清不識市朝路深諳猿鳥情
田衣聯櫛葉山火燎松明自說歸棲後柴門罷送迎

秋日懷新敬二上人

所知惟二仲不見意何如別後雲山阻傳來信息虛
黍梁收露下草木變霜餘應有悲秋作何曾一寄予

雪城重會修蘋州

江湖身不定十載別年兄忽爾重逢面翻疑是隔生濕
雲行有路細雨落無聲惆悵還分手扁舟出郡城

太白山老僧

二十里松陰居來不厭深
雲迷歸日路山是暮年心
水黑龍移井風腥虎過林
消除萬事盡時或動微吟

贈苦行僧

泯然諸念盡木食貌常羸
林下身雖老人間事不知持
經被艾衲禮像藝楓脂
不是忘形者終難學爾為

追送奎上人還鄞

隨緣遊上國興盡即言行
今日不辭我他宵還夢兄
出

山雲滿索歸路水兼程無奈汀洲畔春風草又生

送鑑上人還故山

偶隨流水出不礙滯人間道樹多年別空門此日還瀑
飛春澗淨雲度曉窻間後會應難定相思桂滿山

寄天台萬年淮海禪席

四海今淮海中年主萬年虛空曾悟性文字不離禪靈
瀑煎茶淨寒株拾菌鮮無由親道話夢繞石橋煙

送極上人歸永嘉

心憶東嘉郡殘年別上都住房拋疏鈔歸橐帶餅盃
凍江船溫侵星野飯孤高堂見慈母驚怪長髭鬚

送通嗣法書僧歸隆興

一千餘里路知為爾師行晚嶠踏雲影春江聞浪聲相
逢知有約又別似無情莫話傳衣事北宗人恐爭

送僧行古歸越

孤雲無定跡興至即難留獨往經秦望相期隱沃州雪
晴分去路風急阻行舟舊住如相問惟煩話旅遊

郊行遣興

節序易推遷行行感暮年
麥雲黃冒隴柳浪綠浮川
倦鳥猶知返飄蓬最可憐
故鄉無舊業何計賦歸田

真樂

人皆有所樂此樂獨吾真
一靜滅萬慮空房無點塵
雪清梅骨骼烟養竹精神
羈絆徒千丈難拘散誕身
歲律又將窮山房四壁空
水雲蹤不異松柏性元同
睡起蹲鴟熟香消貝葉終
誰知真樂事却在寂寥中

題故人溪亭

石泉清浸檻終日遠囂紛境與禪心會源從靜處分亂
峰寒蔽日斷壁畫生雲向此長棲止何人得似君

東湖北崦人家

柴門映石枌茅屋似僧庵蠶候家人熟耕時父老諳設
置當兔徑添竹護魚潭賽雨鳴簫鼓迎神向水南

江上人家

江人遂生理社甕足新醅家有兒童樂門無官吏來潮

生漁市合風便客帆開水廟迎神罷喧喧鼓笛迴

冬日山崦人家

曲崦人家少謀生各自安墾耕因地力墾塞禦天寒獵
火明深嶠漁梁露淺灘老翁知客醉語不到悲歡

溪上野人家

隔水兩三家荆扉帶郭斜春風喧燕雀時雨足桑麻翁
媪皆垂白衣冠不尚華烏蓬船一隻出入渡頭沙

向樂古移居山中

高懷厭古市買屋住深峯束帛不可聘世人那易逢故
家遺石鼓好景對金鐘得句憑誰會長歌慰井龍

贈牛羊司范月谿

莫嫌司職小先聖亦曾為蕃息更何事蕭閒且賦詩爾
牲誠具止爾牧自來思考牧宣王雅應拈短笛吹

贈山友

此地長依止人間境亦偏壁蘿斜引蔓崖竹倒垂鞭野
鶴通秋夢妖狐恐夜禪願來相伴住解脫世間緣

贈林隱君

閒居已二毛破屋翳蓬蒿短笛清風在長吟白雪高籬
腰懸瓠小柳癭繫船牢自是嫌機事寧持抱甕勞

贈同志

忘情三十載曾不厭頑疏白石能同煮青山亦共居
聲依樹樂鳥影入雲虛聞道黃精熟相呼又荷鉏

春遊

風和宿雨晴幽屨出柴荆好鳥各相語野花如有情心

閒何用隱身健豈須名今日不行樂真成孤此生

幽處

幽處絕煩喧白雲常在門高歌動澗壑空境外乾坤洗
眼菖蒲水輕身枸杞根閒中存至樂難與俗人言

野處

野處日多暇扶藜信脚行荒原寒鴨陣深巷午雞聲隨
地有幽事閒人無滯情歸來新月上照我入柴荆

山中吟

山林雖寂寞亦可息塵勞野食分猿果寒衣補毳袍雲蹤常散誕松貌極孤高賦詠隨吾意無心更擬騷

蓬戶

蓬戶何須啟年來已絕交色空原自了玄白任渠嘲琴譜添新曲書囊屏舊抄搏風九萬里安隱愧枝巢

有客

有客老柴荆終辭世上名因貧諸事省無位一身輕水月通禪意山雲寄野情草衣兼木食亦足了餘生

立冬日野外行吟

吟行不憚遙風景盡堪
抄天水清相入秋冬氣始交
飲虹消海曲宿鴈下塘坳
歸去須乘月松門許夜敲

塵表

塵表多年住身閒人事稀
或時聯敝衲終日掩柴扉
野鶴惟孤唳寒鴉作陣飛
物情從自異於我總忘機

題果東軒閣維齒不壞輪珠變金色

全德寡知音浮漚亦易沉
終因三昧火始驗一生心
講

齒猶存玉輪珠自化金幾多空掩蔽遺臭在山林

秋分前三日偶成

秋光幾一半在候已無雷顯氣凝為露嘉禾秀出胎燕
銜餘暑去蟲喚嫩寒來泡影非能久流光又苦催

朱靜佳挽詞

詩有盛唐風人稱一代雄朱絃終自直白簡豈能公官
到升朝止身隨過電空傷心千里馬力盡畏塗中

殘燈

殘燈閃閃青蟋蟀怨空庭骨老似難睡夢寒還易醒淒涼生倦枕沉瀟入疏櫺起視東方白唯餘三兩星

山中暑月

城市如堪竈輸茲山水鄉松深不見日瀑近自生涼靜裏疑秋至吟邊喜晝長蕉衣與紈扇皆棄在空箱

時當末伏暑氣愈隆老者殊不能堪而舊業荒殘清涼石室無由歸隱因賦是詩

踽踽復衆衆誰知遠客情衰齡餘六甲酷暑畏三庚舊

業今何有秋衣亦未成東鄰弄羌管休作斷腸聲

桐州先師塔

耿介絕依憑清虛尚飲水悟明中觀論度越小乘僧夢
已三生破神應九品陞法門誰得髓石塔冷孤燈

秋日

秋氣清如此閒踪信所如因窮流水脉偶到野僧居地
遠囂紛息山回響答虛幾人來不得老死向塵車

秋懷

西風吹客襟客正白頭吟無復歡娛意惟傷遲暮心飲
虹明遠浦饑鶻下荒林日月不相貸人生那易禁

田父

田父秉耒耜東郊生意繁風和土脉應雨過水花渾麥
隴抽新穗秧疇腐宿根春耕易為力歡笑語兒孫

旅懷

客路何當極家林久未還只今明鏡裏又覺鬢毛斑夜
雨添春水寒雲沒曉山彊吟無好思佳句也應慳

綠陰滿院

一年花信過滿院綠陰多老子於中住新鶯每到歌蕭
閒遺世慮清淨合天和好是孤雲性誰能管得他

出戶

出戶逢幽客相攜過別村凍開泥徑滑橋斷石星存雲
起難知處泉流自有源老農心甚適耕鑿長兒孫

心鏡

不存分別見真是與盲同常以身為觀因知色即空無

生方會道取相未成功此意吾嘗得皆歸心鏡中

古柏

庭前雙柏子曾入祖師禪黛色參天古貞心比石堅材
堪舟楫用名在邨廊篇歲晚冰霜裏清標獨蔚然

初春賡李貧房韻

飄零長是客節物更催人前日方辭臘今朝又得辛一
天回暖氣九陌動遊塵心愛青藜杖多年伴老身

忘歸

久作餘英客溪山似有緣柳堤便野步竹寺稱幽禪結
伴尋沙鷺忘歸笑杜鵑翛然繩檢外頗覺勝神仙

酬友人見寄

山房一事無開篋理殘書習氣嗟難斷閒情為折除菊
籬秋爛熳楓徑意蕭疎忽枉瑤華贈知君又起予

酬李箕房見寄

修篁古君子谿上有清風直節應難並高標自不同嬋
娟消俗慮培養見深功愛此黃鐘管傳聲到谷中

野老

野老一身輕於今野趣成交遊木上座疏濶楮先生溪
甌吹菰米山巵咀菊英林園道子好時復到柴荆
溪頭逢野老邀我過橋東牛卧閒田上雞鳴村巷中豆
乾霜腹飽蓮倒露房空鄰里交相命桃源風景同

老去

老去寡交游孤吟倚石樓風生雲漸散虹見雨初收蒼
莽天將暮淒清氣似秋玄猿慰岑寂長嘯碧峰頭

老去玄衣敝歸來白屋寒故書多散失時事轉艱難背
日松慳長經霜菊盡乾鄰翁猶念舊扶杖數相看

竹坡舊隱

路轉新塘曲舟通別墅幽覺華嚴佛地梵放雜漁謳杭
徐連疇晚陵渠四澤秋竹坡今不作清淚落菟裘

隱居

隱居那用名名沒隱方成交絕身常定心安病不生山
肴珍白簞野飯美青精回視人間世何如戲一棚

嚴維石端研詩

端溪下巖石，綆鑿出重淵。
溫澤非人力，精華得自然。
龍涎紫霞聚，鵝眼碧光圓。
玉德終無變，斯文萬古傳。

稻熟而遭巨浸以詩傷之

九秋禾正熟，三日雨滂沱。
畝畝黃雲失，溝塍白水多。
豈知民已病，猶苦賦重科。
父子難相保，流離可奈何。

咏梅

仙姿孤潔甚，不與衆芳期。
的皪臨寒澗，淒清闔短籬。
祇

愁風作惡最與雪相宜野叟心偏愛莓苔古怪枝
萬木凋零盡知經幾度霜獨餘冰玉質薰得夢魂香影
入清泉瘦聲傳畫角長每因春爛熳惆悵失孤芳

怪怪復奇奇照溪三兩枝首陽清骨骼姑射靜丰姿桃
李應非伍松筠素有期憑他伴幽寂玉笛且休吹

冬日

交因貧盡絕嬾與病相兼客裏朱顏失吟中白髮添衲
衣冬未補霜氣夜來嚴坐待朝曦上支離曝短簷

元日作是歲除夕立春

臘窮春自至四序遞相延
玄髮成華髮添年是減年
解筒灰已動象魏灋初懸
吾獨存吾道凝然不受遷

錢塘江潮

初聞萬馬聲漸覺似長城
遠自三山起高連兩岸平
淩風添怒勢映日作虛明
若是吳胥魄如何渡越兵

